

Bericht der Präsidentin GV 2019

**Min Bricht isch dasmol so churz wie no nie
Will ich i dem Johr nüd überall debie ha chönne si
De Grund isch will ich ha dörfe is Ersatzteillager go
Demit ich mich wieder fit fühle und go laufe cha go**

**Im Februar simmer bi de Karin dehei gsi zum korrigiere
Und debie die neue Statute nach Vorlage z`kreieren
Die Pendenza isch eus uf em Mage gläge drumm simmer am
separiere
Jetzt chömer aber stolz si und eu die neu Version präsentiere**

**Eusi neu Aktuarin isch do au ziemli gforderet gsi
Het das aber mit links gmeischeret debie
Claudia a dere Stelle en ganz bsondere Dank defür
Du hesch nach eusere Meinig es super guets gspür.**

**D'Zusage dezu vom Verband das alles stimmt hämmer übercho
Het zweu chliini Amerkige dezu was korrigiert wurde isch e so
Drumm chömer A de GV i dem Sinn alli dezue stoh
Und d'Abstimmig ohne Problem über eus lo goh.**

**I de Rückrundi vom Netzbball in Wohle wird um jede Punkt kämpft
Au eusi Netzbballerinne sind motiviert und überhaupt nüd dämpft
Si spieled wie hergöttli und lönd sich nüd lo übertrumpfe
und düend bim gwünne richtig uf em Platz umegumpe**

**Fürs organisiere vom Aperö vo eusere Fraueriege händ mich
verträte
Eusi Renata d`Astrid und Claudia die drüü nätte
Danke defür tuen ich ihne dodemit nomol säge
Und s'Dankeschön und s'Lob vo de Fraueriege grad au überträge**

**Karin und d`Renata sind a de Delegierteversammlung in Bern gsi
Händ sich über alles informiert und wichtigi Details übercho debie
Denn euses Mitgliederprogramm vom Verband soll abgelöst werde
Defür`stoht`s STV Programm neu i dere Kerbe**

**Denn eusi Jugi isch das Johr es bsonders Grüppli
Und choched mängisch ihres eigenes Süppli
Sie chömed oder chömed au nöd
Das isch für eus Beidi ziemli blöd**

Wieso chamer sich nüd abmälde wenn's nüd goht
Oder au säge wenn über d'Schul en Alass besteht
Mir stönd ab und zu i de Halle mit so wenig Chind
Und fröged eus nueme wo alle die andere sind.

das Problem muess glöst werde, das isch eus klar
Wie mir das astelled isch noni so offesichtlich und glasklar
Mir sind aber überzügt devo dass mir au das schaffed
Und wiiter hin für Alli Chind do sind und drüber lached

Vom Grillplausch chan ich au gar nüd schriibe
Drum tuen ich jetzt i Ferieprogramm übere biime
Bim Minigölfle simmer sogar dasmol zweu Gruppe gsi
Und händ de chlini Bölle überall hi gschosse debie

Dum hämmer au viel Grund zum Lache debie gha
Denn hämmer eus au bi de Annemarie dehei troffe
Die einte sind Velogfahre die ander gloffe
Au det hämmer en luschtige Obig dörfe ha
Viele Dank defür vo eus Fraue und zäme mit eim Maa.

Über Turnerinnereis do muess öper anderscht schriibe
Ich bi i dere Ziit i de Veloferie im Schwarzwald bliibe
So wie ich ghört han händ alli die Reis gnosse is Appezellerland
Wo vo de Astrid organisiert wurde isch und suscht no Allerhand

De Kinoobig im Orient als Abschluss vo dem Johr
Hämmer alli gnosse dem chönt alli zustimme das isch wohr
Die Idee isch empfehlenswert und chönnti wiederholt werde ohni
Spass
Ich glaub das findet au alli andere nüd nueme krass.

D'Waldwiihnacht euses Sorgechind wieder emol
Het dur es missverständnis troffe es eigegegool
Wägem Wätter isch es zerscht unklar gsi
Und denn hät d'Verständigung underenand nüd klappet debie

Drum sind denn nueme zweu drüü Bsucher gsi
Was eigentlich nüd hetti müsse si
Mer muess do sicher über Buecher goh
Und suscht eus öppis anders überlegge do.

**Und scho bin ich jetzt wieder am Schluss vom mim Bricht
Ha hoffentlich nüd vergäss glaub ich us minere Sicht
De Renata dörf ich a dere Stelle no Danke säge
I glaub au im Name vo eu Allne und bsonders wäge**

**De tolle und schöne Turnstunde wo mir dörfed gnüesse
Und mängisch au en chline Muskelkater düend begrüesse
So wämmers jo ha und sind alli zfriede debie
Suscht wäred mir jo gar nüd i de halle gsi.**

Renata mir gnüessed die Turnstunde mit dir

Eui Präsidentin